



**U ovom broju, između ostalog, čitajte:**

- **Na inicijativu UPFBiH otpočeo proces vakcinacija radnika u prostorijama kompanija u KS**
- **Ministarstvo zdravstva TK podržalo inicijativu UPFBiH za imunizaciju radnika u prostorijama kompanija**
- **Udruženje poslodavaca FBiH i Sindikat metalaca FBiH potpisali Kolektivni ugovor**
- **Otvoreno pismo Vladi i Parlamentu FBiH: Hitno usvojiti zakone koji će rasteretiti cijenu rada i omogućiti značajno povećanje najniže plaće u FBiH**
- **Počeli pregovori o granskom kolektivnom ugovoru za djelatnost drvne i papirne industrije u FBiH**
- **Otvoreno pismo: UPFBiH traži hitan sastanak i smanjenje cijene cestarine za 20 do 25 posto**
- **Pregovarački timovi UPFBiH za zaključivanje granskog kolektivnog ugovora za djelatnost trgovine te za djelatnost tekstilne industrije održali odvojene sastanak**





## **UPFBiH pozvalo kompanije sa područja KS da se prijave za vakcinaciju radnika u prostorijama kompanija**

### **UPFBiH predložilo ovaj sistem kako bi se ubrzao proces imunizacije i zaštitilo zdravlje uposlenika**

Na inicijativu Udruženja poslodavaca Federacije Bosne i Hercegovine, rukovodstvo UPFBiH održalo je sastanak s ministrom zdravstva Kantona Sarajevo i predsjednikom Kriznog štaba ministarstva zdravstva KS Harisom Vranićem na kojem je dogovoreno uvođenje procesa imunizacije uposlenika u prostorijama kompanija na području Kantona Sarajevo, u saradnji sa UPFBiH i Ministarstvom zdravstva KS.



S ciljem zaštite života i zdravlja uposlenika, omogućavanja normalnih radnih tokova i kontinuiteta ekonomskih aktivnosti, Udruženje poslodavaca FBiH je predložilo ovaj sistem kako bi se ubrzao proces imunizacije.



Ministarstvo zdravstva Kantona Sarajevo je podržalo ovu inicijativu te je Udruženje poslodavaca Federacije BiH pozvalo članice da do kraja radne sedmice prijave broj radnika koji su zainteresovani za imunizaciju, kako bi se isti sproveo iduće sedmice. Svi privredni subjekti koji budu onemogućeni izvršiti prijavu za imunizaciju do kraja tekuće

sedmice, prijave mogu vršiti od ponedjeljka 30.08.2021. godine, te će u tim kompanijama proces imunizacije započeti naknadno, odnosno tokom naredne sedmice.

Radnicima će biti dostupne vakcine AstraZeneca i Sinopharm. Iz Ministarstva zdravstva Kantona Sarajevo naglašavaju da Pfizer vakcine u ovom momentu neće biti dostupne jer su rezervisane za početak imunizacije učenika.



Udruženje poslodavaca Federacije Bosne i Hercegovine

uputilo je dopise i ostalim kantonalnim ministrima zdravstva i kriznim štabovima kako bi se ista aktivnost održala i u drugim kantonima i unaprijedio proces imunizacije.

## Na inicijativu UPFBiH dogovoren proces imunizacije radnika na području KS

**Cilj je da se u kompanijama u FBiH potpuno vakciniše do 30.000 ljudi**



Počele su pripreme za vakcinaciju radnika u prostorijama kompanija na području Kantona Sarajevo što je rezultat dogovora Udruženja poslodavaca FBiH sa ministrom zdravstva KS i predsjednikom Kriznog štaba ministarstva zdravstva KS Harisom Vranićem.

„Sa ciljem zaštite života i zdravlja uposlenika, omogućavanja normalnih radnih tokova i kontinuiteta ekonomskih aktivnosti, UPFBiH je predložilo da se vakcinacija radnika obavi u prostorijama kompanija što je prihvatilo Ministarstvo zdravstva KS. Uputili smo poziv kompanijama sa područja KS i za jedan dan se prijavilo 15 kompanija i između 850 i 1.000 radnika. Naš cilj je da se u kompanijama u FBiH potpuno vakciniše do 30.000 ljudi i ako se ovakav trend nastavi i bude dobar odziv u drugim kantonima, nadam se da ćemo to i postići. Pozivamo sve kompanije da se prijave i one koje nisu članice UPFBiH jer je riječ o općedruštvenom cilju, a to je da se postigne visok procenat vakcinisanosti stanovništva“, kazao je direktor Udruženje poslodavaca FBiH Mladen Pandurević.

Udruženje poslodavaca Federacije BiH pokrenulo je ovu aktivnost na području cijele Federacije BiH i cilj je da se saradnja uspostavi sa svih deset kantonalnih ministarstava zdravstva i kriznih štabova, te se početkom naredne sedmice očekuje odgovor većine kantonalnih ministarstava.

Ministar zdravstva KS Haris Vranić zahvalio se Udruženju poslodavaca FBiH koje je pokazalo društvenu odgovornost, naglašavajući da je vakcinacija jedini put ka vraćanju u normalni život.



„Pored radnika iz kompanija koje su se prijavile bit će omogućeno i vakcinisanje njihovih članova porodica i ostalih zainteresovanih za šta je potrebno da se prijave UPFBiH koje će Ministarstvu dostaviti spiskove“, kazao je ministar Vranić.

Dodao je da trenutno radnici mogu birati vakcine AstraZeneca i Sinopharm, a da se očekuje da će uskoro i vakcina Pfizer biti dostupna.

„Raduje me što je do sada dosta dobar odziv kompanija. U narednih nekoliko dana proces imunizacije po kompanijama će započeti, za šta će biti angažovano deset medicinskih sestara i tehničara koji će činiti mobilne timove. Neophodno je da radnici imaju zdravstvenu knjižicu, a sa Zavodom zdravstvenog osiguranja KS bit će iskoordinirano izdavanje potvrda o vakcinaciji. Također, radnici iz drugih kantona također mogu biti vakcinisani, a potvrdu o vakcinaciji će moći dobiti u kantonu prebivališta“, kazao je koordinator za vakcinaciju Ademir Spahić.

Udruženje poslodavaca FBiH pozvalo je predstavnike Udruženja banaka, Udruženja društava za osiguranja, kantonalne privredne i obrtničke komore, Udruženja taksista i ostala poslodavačka udruženja da se jave kako bi dogovorili dalje aktivnosti, a koje se odnose na imunizaciju radnika.

## Počela vakcinacija radnika u prostorijama firme na području Kantona Sarajevo

### Inicijativa UPFBiH već prvog dana daje dobre rezultate

Na inicijativu Udruženja poslodavaca Federacije Bosne i Hercegovine danas je počela vakcinacija radnika u prostorijama kompanija na području Kantona Sarajevo. Danas je mobilni medicinski tim vakcinisao uposlenike kompanija Euroasfalt, Konzum i JP Željeznice FBiH, a vakcinisano je oko 500 osoba.



„Kao društveno odgovorna kompanija odazvali smo se na hvale vrijednu inicijativu Udruženja poslodavaca FBiH o vakcinisanju naših radnika unutar kompanije. Danas će u upravnoj zgradi Konzuma biti vakcinisani zaposlenici iz maloprodajnih objekata, logistike i uprave na dobrovoljnoj osnovi. Temeljem zaprimljenih prijava sačinili smo raspored vakcinisanja tako da se dok traje proces vakcinacije zaposlenika kupovina i radni procesi i dalje neometano odvijaju u našim prodajnim objektima. Proces



vakcinacije se danas provodi u Sarajevu, a u narednim danima ćemo organizirati vakcinisanje naših zaposlenika i u drugim poslovnim regijama odnosno kantonima. Odazvali smo se pozivu UPFBiH za vakcinaciju radnika unutar kompanije, jer na taj način želimo podići na viši nivo stepen zaštite zdravlja kako naših zaposlenika, tako i naših kupaca omogućavajući im obavljanje svakodnevne kupovine uz visoku razinu

zdravstvene sigurnosti“, kazao je rukovoditelj Sektora marketinga kompanije Konzum Haris Arnautović.



Koordinator za vakcinaciju u Kantonu Sarajevo Ademir Spahić, naglasio je da inicijativa Udruženja poslodavaca FBiH, koja se provodi u dogovoru sa Ministarstvom zdravstva KS, već prvog dana daje dobre rezultate.

„Danas ćemo vakcinisati uposlenike tri kompanije, za sutra je predviđena vakcinacija radnika GRAS-a, Europa Group, VW. Očekujemo da ćemo do kraja iduće sedmice završiti proces vakcinacije po firmama u Kantonu Sarajevo. Na raspolaganju su vakcine Astra Zeneca i Sinofarm. Moram istaknuti da niko od radnika koje danas vakcinišemo ne postavlja pitanje koja je vakcina u pitanju i to je pravi pristup kada je u pitanju vakcinacija“, kazao je Spahić.

Uposlenica Konzuma Amira Jahić zahvalila je na mogućnosti da se radnici vakcinišu u svojim kompanijama.



„Za veliki broj radnika gotovo je nemoguće da odu sa posla i obave vakcinaciju na punktu u Zetri. Vakcinacijom štitim sebe, svoju porodicu, radne kolege i naše kupce te se ovom prilikom zahvaljujem svojoj kompaniji na inicijativi i mogućnosti organizovanog vakcinisanja“, kaže Jahić.



Radnici koji prime vakcine u prostorijama kompanija dobit će važeću potvrdu o vakcinaciji.

## Ministarstvo zdravstva TK podržalo inicijativu UPFBiH za imunizaciju radnika u prostorijama kompanija



Na inicijativu Udruženja poslodavaca Federacije Bosne i Hercegovine otpočela je imunizacija radnika u prostorijama kompanija na području Kantona Sarajevo. Ista inicijativa upućena je i ostalim kantonalnim ministarstvima zdravstva s ciljem zaštite zdravlja i života i postizanja veće imunizacije građana, te je Ministarstvo zdravstva Tuzlanskog kantona promptno prihvatilo inicijativu.

Ministarstvo zdravstva Tuzlanskog kantona je obavijestilo kantonalne domove zdravlja o postignutom dogovoru između Ministarstva i Udruženja poslodavaca FBiH te zatražilo aktivno uključivanje kako bi se postigao visok procenat vakcinacije građana s područja Tuzlanskog kantona.

Udruženje poslodavaca Federacije Bosne i Hercegovine poslalo je dopis članicama i ostalim privrednim subjektima da se obrate lokalnim nadležnim domovima zdravlja za dalju realizaciju inicijative.





## **Otvoreno pismo Vladi i Parlamentu FBiH: Hitno usvojiti zakone koji će rasteretiti cijenu rada i omogućiti značajno povećanje najniže plaće u FBiH**

**Što prije usvojiti Zakon o doprinosima FBiH čijim  
odredbama će biti definisano da doprinosi na  
plaću mogu iznositi maksimalno do 30 posto i  
Zakon o porezu na dohodak**

Udruženje poslodavaca Federacije Bosne i Hercegovine obratilo se otvorenim pismom Vladi Federacije BiH, Zastupničkom domu Parlamenta FBiH i Domu naroda PFBiH kojim se traži hitno usvajanje zakona koji će rasteretiti cijenu rada i omogućiti povećanje najniže plaće u FBiH.

U pismu se navodi: "Udruženja poslodavaca Federacije Bosne i Hercegovine i Sindikat metalaca Federacije Bosne i Hercegovine su ispregovarali Kolektivni ugovor za djelatnost metalske industrije koji će biti potpisan 05.08.2021. godine.

Obje strane su saglasne da je Udruženje poslodavaca FBiH prihvaćajući prijedlog Sindikata metalaca FBiH o iznosu najniže satnice za metalni sektor napravilo najveći mogući ustupak.

Objektivno, prostor za dalje povećanje minimalne satnice apsolutno ne postoji ukoliko hitno ne dođe do smanjenja opterećenja cijene rada i ispravljanja disbalansa koji postoji kod plaća u javnom i privatnom sektoru koji u ovome trenutku iznosi 1:2 u korist javnog sektora.

Zato insistiramo i zajednički vas pozivamo da što prije usvojite Zakon o doprinosima FBiH čijim odredbama će biti definisano da doprinosi na plaću mogu iznositi maksimalno do 30 posto i Zakon o porezu na dohodak. Poslodavci su se ranije obavezali da će sva sredstva koje firme uštede po ovom osnovu biti iskorištena za povećanje plaća zaposlenih.

Također insistiramo na hitnom usvajanju Izmjena i dopuna Zakona o porezu na dobit FBiH kojim se reinvestiranje oslobađa plaćanja poreza na dobit.

Insistiramo i na hitnom usvajanju Izmjena i dopuna Zakona o porezu na dohodak FBiH u kojem će biti značajno povećan neoporezivi dio plaće za radnike.

Hitnim usvajanjem ovih zakona stvara se prostor za značajno povećanje najniže plaće u FBiH pri čemu neće doći do značajnijeg smanjenja priliva sredstava u budžetske i vandbudžetske fondove FBiH.



Podsjećamo da su porezi i doprinosi na plaće u Federaciji BiH u ovome trenutku najveći u Europi što u značajnoj mjeri otežava poslovanje kompanijama, smanjuje konkurentnost, investiranje u nove pogone, otvaranje novih radnih mjesta, te dalji rast i razvoj privrede.

Pozivamo javnost i građane da izvrše maksimalan pritisak na predstavnike izvršne i zakonodavne vlasti, da konačno svoja obećanja pretvore u djela i usvoje zakonska rješenja koja su u njihovoj nadležnosti, a čije usvajanje će dovesti do značajnog rasta plaća u realnom sektoru što će rezultirati boljim standardom građana, rasterećenja privrede i poboljšanja poslovnog ambijenta. Insistiramo samo da ispune obećanja koja su dali građanima i međunarodnoj zajednici u BiH kroz Reformske agende 1 i 2".

Otvoreno pismo su potpisali direktor Udruženja poslodavaca Federacije Bosne i Hercegovine Mladen Pandurević i predsjednik Sindikata metalaca Federacije BiH Bajro Melez.

## Udruženje poslodavaca FBiH i Sindikat metalaca FBiH potpisali Kolektivni ugovor

**Potpisanim kolektivnim ugovorom definirana je najniža satnica koja sada iznosi 3,50 KM neto**



Kasim Kotorić, u ime Grupacije poslodavaca za djelatnost metalne industrije Udruženja poslodavaca Federacije Bosne i Hercegovine i Bajro Melez, u ime Sindikata metalaca Federacije BiH potpisali su Kolektivni ugovor o pravima i obavezama poslodavaca i radnika za djelatnost proizvodnje i prerade metala u Federaciji BiH. Potpisanim kolektivnim ugovorom definirana je najniža satnica koja sada iznosi 3,50 KM neto.

„Naše članice iz sektora metalnog sektora su još jednom potvrdile svoju socijalnu osjetljivost i društveno odgovorno poslovanje i prihvatile prijedlog Sindikata da najniža satnica bude 3,50 KM neto. Na taj način najniža osnovna plaća u metalnom sektoru iznosi 615 KM, a sa naknadama za topli obrok, prijevoz i regres najniža primanja u ovom sektoru će biti između 800 i 900 KM. Ovo je maksimum opterećenja koje poslodavci mogu podnijeti kada je u pitanju najniža plaća. Za značajnija povećanja nužno je značajno smanjiti doprinose i poreze na plaće koji su u ovom trenutku najviši u Europi. Još jednom pozivamo predstavnike izvršne i

zakonodavne vlasti u FBiH da usvoje zakon o doprinosima koji neće biti veći od 30 posto, zakon o porezu na dobit kojim se reinvestiranje oslobađa od plaćanja poreza na dobit i zakon o dohotku FBiH. Na taj način će se stvoriti prostor za značajnije povećanje najnižih plaća u FBiH", kazao je Mladen Pandurević, direktor Udruženja poslodavaca Federacije Bosne i Hercegovine.



Bajro Melez je istaknuo da je ispunjeno obećanje te da radnici u sektoru metalne industrije ni dana neće raditi bez kolektivnog ugovora.



„Zahvaljujemo Udruženju poslodavaca FBiH na korektnom odnosu i saradnji, što je rezultiralo potpisivanjem kolektivnog ugovora. Mi insistiramo na i zahtijevamo od vlasti u FBiH da smanje poreze i doprinose na plaće što će nam omogućiti značajnije povećanje najniže plaće u Federaciji BiH", kazao je Melez.

Kasim Kotorić je istaknuo da u ovome trenutku metalni sektor trpi veliki pritisak.

„Na svjetskom tržištu su sirovine poskupile za 120 posto. U Federaciji BiH porezi i doprinosi nisu smanjeni, naprotiv u međuvremenu smo dobili



nove ili je povećana cijena postojećih parafiskalnih nameta što predstavlja dodatni pritisak na poslodavce", naglasio je Kotorić

Potpisani Kolektivni ugovor će se početi primjenjivati nakon objave u Službenim novinama FBiH, a do kraja septembra trebali bi biti potpisani i drugi kolektivni ugovori između UPFBiH i sindikata iz realnog sektora.

[Kolektivni ugovor o pravima i obavezama poslodavaca i radnika za djelatnost proizvodnje i prerade metala u FBiH](#)

## **Otvoreno pismo: UPFBiH traži hitan sastanak i smanjenje cijene cestarine za 20 do 25 posto**

### **Građani i privreda u FBiH plaćaju najvišu cijenu cestarine u Europi**

Udruženje poslodavaca FBiH uputilo je otvoreno pismo Vladi Federacije BiH, Ministarstvu prometa i komunikacija FBiH i Upravi JP Autoceste FBiH u kojem traže hitan sastanak sa ministrom Denisom Lasićem i Elmedinom Voloderom, v.d. direktora Autocesta.

"Udruženje poslodavaca Federacije Bosne i Hercegovine zahtijeva hitan sastanak sa Denisom Lasićem, ministrom prometa i komunikacija FBiH i Elmedinom Voloderom, v.d. direktora JP Autoceste FBiH na kojemu bi predstavnici UPFBiH detaljnije obrazložili problematiku previsoke cijene cestarina na autocesti A1 i uručili zahtjev za hitno smanjenje cijene naknade za korištenje autoceste A1 za 20 do 25 posto.

Svjedoci smo da se posljednjih dana u javnosti problematiziraju dijelovi izvještaja Ureda za reviziju institucija u FBiH, naročito oni koji su pokazali da je za 91 kilometar izgrađene autoceste

u JP Autoceste FBiH zaposleno 120 blagajnika i 40 vođa smjene. Posebno su istaknute neprimjereno visoke plaće Uprave i zaposlenih u JP Autoceste FBiH.



Nas u UPFBiH ovi nalazi revizora u JP Autoceste FBiH ne iznenađuju, jer već godinama upozoravamo na činjenicu da građani i privreda u FBiH plaćaju najvišu cijenu cestarine u Europi. Prije godinu dana smo uradili analizu Uredbe o naplati naknade za korištenje autoceste A1 te smo utvrdili da nije ispravno primijenjena važeća formula za izračun cijene cestarine po kategorijama vozila i da se odstupilo od člana 6. Pravilnika o sistemu naplate cestarine na autocestama, brzim cestama i objektima sa naplatom u FBiH. Naime, analizom formule za izračun cijene cestarine po kategorijama vozila utvrdili smo da se trenutno npr. na dionici autoceste A1 Sarajevo – Zenica, BNM Lašva naplaćuje četiri KM za prvu kategoriju vozila, 8,5 KM za drugu kategoriju vozila, 12,5 za treću i 17 KM za četvrtu kategoriju vozila. A prema propisanoj formuli cijene bi trebale iznositi četiri KM za prvu, osam KM za drugu, 12 KM za treću i 16 KM za četvrtu kategoriju vozila.

UPFBiH je, također, uradilo uporednopravnu analizu zakonodavstva zemalja iz okruženja koja je pokazala da se u Federaciji BiH trenutno plaća znatno skuplja cestarina nego u zemljama okruženja i zemljama članicama EU.

Utvrdili smo da u FBiH cestarina po pređenom kilometru za prvu kategoriju vozila u prosjeku iznosi 0,12 KM, za treću kategoriju 0,35, a za četvrtu 0,50 KM. Istovremeno, u Republici Srpskoj cestarina u prosjeku iznosi 0,09 KM. Kada su u pitanju zemlje regiona, u Srbiji cestarina

u prosjeku iznosi 0,035 eura ili 0,06 KM, u Sjevernoj Makedoniji 0,020 eura ili 0,004 KM, a u Turskoj 0,039 eura ili 0,078 KM.

Kada su u pitanju zemlje članice Europske unije, uzet ćemo primjer Grčke gdje cestarina po pređenom kilometru iznosi 0,045 eura ili 0,09 KM i Italiju gdje cestarina po pređenom kilometru u prosjeku iznosi 0,50 eura ili 0,10 KM.



Uporedili smo i dvije dionice autoceste u Hrvatskoj i Bosni i Hercegovini približno jednake dužine. Radi se o dionici Zagreb – Zdenčina čija je dužina 27 kilometara i pomenutu dionicu Sarajevo – Zenica (BNM Lašva) čija je dužina 26.7 kilometara. U Hrvatskoj vozila treće kategorije plaćaju cestarinu 17 kuna (oko 4,40 KM), a vozila četvrte kategorije 29 kuna (oko 7,50 KM). U FBiH na pomenutoj dionici

autoceste vozila treće kategorije plaćaju naknadu u iznosu od 9,50 KM.

Kao primjer navodimo i Njemačku koja ima 13.100 kilometara autocesta, gdje cestarinu plaćaju samo vozila iznad 7,5 tona težine, pri čemu je prosječna cijena naplate cestarine niža nego u FBiH.

Osim što građani i prevoznici u FBiH plaćaju najskuplju cestarinu za korištenje autoceste, podsjećamo da prema odredbama Zakona o akcizama Bosne i Hercegovine postoji obaveza plaćanja akcize na naftne derivate plus obaveza plaćanja putarine kao indirektnog poreza u iznosu od 0.15 KM po jednom litru proizvoda za puteve i 0.10 KM za izgradnju autocesti. Također, svaki vozač prilikom registracije vozila dužan je platiti „putarinu“, koja u zavisnosti od snage vozila iznosi od 25 do 250 KM.

I pored svih navedenih plaćanja čija sredstva bi se trebala namjenski trošiti za autoceste i



puteve, svjedoci smo da u cijeloj BiH trenutno imamo izgrađenih 208 kilometara autoceste, sa vrlo nekvalitetnim cestama.

Zbog svega navedenog zahtijevamo smanjenje cijena cestarine za korištenje autoceste A1 za 20 do 25 posto. Svjedoci smo da mnogi ne koriste autocestu u FBiH

upravo zbog tako visokih cijena cestarine pa bi niže cijene cestarine dovele do većeg korištenja autoceste za prevoz, a samim tim i prihoda.

Raspolažemo informacijama da većina prevoznčkih kompanija koristi autocestu samo kada su im kamioni i druga transportna vozila natovareni robom, kada kamioni voze prazni koriste alternativne pravce, jer im je to jeftinije. Mnogi, alternativne pravce (magistralne, regionalne i lokalne ceste) koriste i za prijevoz robe, kako bi izbjegli plaćanje visokih cijena cestarine, pri čemu dolazi do značajnih oštećenja ovih alternativnih pravaca, jer oni i nisu namijenjeni za prevoz roba.

U više navrata smo pokušali dogovoriti sastanak sa bivšim direktorom JP Autoceste FBiH, što je on odbijao upućujući nas na službenike u JP Autoceste FBiH, koji uz dužno poštovanje niti su ovlašteni, niti mogu poduzimati konkretne korake kako bi se ovaj problem riješio. Takvo ponašanje smatramo neprihvatljivim.

Nemamo ništa protiv činjenice da na rukovodeće pozicije u javnim preduzećima stranke imenuju svoje kadrove. Ali, ti kadrovi moraju biti eksperti u oblasti za koju se imenuju i moraju biti svjesni da su oni i javne kompanije kojima rukovode servis građanima i privredi. Ne mogu i ne smiju se ponašati po principu da su oni iznad ili izvan sistema, kao što je do sada često bio slučaj.

Zbog svega navedenog zahtijevamo da se što hitnije zakaže sastanak sa resornim ministrom i v.d. direktora JP Autoceste FBiH, kako bismo ukazali na ove, ali i druge probleme vezane za korištenje autoceste, s ciljem zajedničkog iznalaženja rješenja za smanjenja cijena cestarine za građane i privrednike.“



## Počeli pregovori o granskom kolektivnom ugovoru za djelatnost drvne i papirne industrije u FBiH




Pregovarački timovi Udruženja poslodavaca Federacije Bosne i Hercegovine i Samostalnog sindikata šumarstva, prerade drveta i papira BiH održali su 26. augusta 2021. godine sastanak u cilju pregovaranja granskog kolektivnog ugovora za ovu djelatnost.

Ovim kolektivnim ugovorom uređuju se prava i obaveze strana koje ga zaključuju te prava i obaveze iz radnog odnosa ili u vezi sa radnim odnosom poslodavaca i radnika privrednih društava u djelatnosti drvne i papirne industrije na teritoriji FBiH kao i djelovanje i uvjeti rada sindikata, pravila o postupku kolektivnog pregovaranja, sastav i način postupanja tijela ovlaštenih za mirno rješavanje kolektivnih radnih sporova, u skladu sa zakonom i drugim propisima.

Na sastanku je postignut veliki napredak i postignut dogovor o većini odredbi kolektivnog ugovora. Očekuje se da će se na narednom sastanku pregovaračkih timova pristupiti dogovoru o potpisivanju Kolektivnog ugovora za djelatnost drvne i papirne industrije u FBiH.

## Održan sastanak Pregovaračkog tima za zaključivanje kolektivnog ugovora za djelatnost tekstilne industrije



Sastanak Pregovaračkog tima Udruženja poslodavaca FBiH za zaključivanje granskog kolektivnog ugovora za djelatnost tekstilne industrije i industrije kože i obuće za teritoriju FBiH održan je 25. augusta 2021. godine. Sastanak je predvodila predsjednica Pregovaračkog tima Behrija Huseinbegović, a tema sastanka je priprema za započinjanje pregovora za zaključivanje ovog granskog kolektivnog ugovora.

Ovim kolektivnim ugovorom uređuju se prava i obaveze strana koje ga zaključuju, te prava i obaveze iz radnog odnosa ili u vezi sa radnim odnosom poslodavaca i radnika privrednih društava u djelatnosti tekstilne, kožarsko-prerađivačke, gumarske i industrije obuće na teritoriji FBiH, kao i djelovanje i uvjeti rada Sindikata, pravila o postupku kolektivnog pregovaranja, sastav i način postupanje tijela ovlaštenih za mirno rješavanje kolektivnih radnih sporova, te druga pitanja od značaja za poslodavce i radnike u skladu sa zakonom i drugim propisima.

Nakon što Pregovarački UPFBiH tim sprovede pripremne aktivnosti, Sindikat tekstila, kože, obuće i gume Federacije Bosne i Hercegovine bit će pozvan na otvaranje pregovora.

## Milionske štete po privredu zbog nerada Komisije za vrijednosne papire


Štete po privredu Federacije Bosne i Hercegovine mogu se mjeriti milionima KM jer već 20 mjeseci Federalni parlament nije uspio donijeti odluku o imenovanju Komisije za vrijednosne papire FBiH.

Članove te komisije predlaže predsjednik Federacije BiH uz saglasnost dva potpredsjednika, a prvobitno predloženi sastav nije imao ni jednog predstavnika Srba zbog čega je Klub Srba u Domu naroda FBiH odbio podržati tako predloženu odluku.

Odluka je vraćena na doradu i provođenje nove procedure kada je za člana predložen i predstavnik Srba. Tako predloženu novu odluku usvojio je Zastupnički dom, dok Dom naroda to još nije učinio.

Povodom tih problema i činjenice da već 400 predmeta čeka na rješenje, oko 70 posto dioničarskih društava je blokirano, a strane investicije potpuno onemogućene, u Sarajevu je sazvan sastanak predstavnika Doma naroda i privredne zajednice.





Sastanak su organizirali članovi Kolegija Doma naroda Parlamenta Federacije BiH Jasmin Duvnjak i Ivo Tadić na kojem su učestvovali predstavnici Privredne komore FBiH, Vijeća stranih investicija, Udruženja banaka i Udruženja poslodavaca FBiH.

Svi učesnici sastanka na pres-konferenciji zajednički su uputili apel strankama koje imaju svoje predstavnike u Federalnom parlamentu da 9. septembra, kada bi trebala biti održana sjednica Doma naroda, podrže novopredloženu odluku i "odblokiraju" privredu.

Duvnjak je kazao da je zbog ovakve situacije privredi u Federaciji "spuštena rampa" u vrijeme ekonomske krize, zbog čega je pozvao na razumijevanje buduću da se ovim šalje veoma loša poruka poslovnoj zajednici.

"Potrebno je donijeti odluku kako bismo ovaj strašan pritisak koji se stvara nad privredom eliminirali. Nema Komisije koja bi verificirala promjene upravljačkih struktura, a investitor ne može do kraja završiti pravno svoju investiciju", dodao je Duvnjak.


Tadić je također izrazio očekivanje da će odluka dobiti podršku na sjednici Doma naroda pozivajući delegate da prevaziđu svakodnevna politička prepucavanja jer je ovo pitanje prevažno.

Izvršna direktorica Vijeća stranih investitora BiH Sanja Miović napominje da ovakva situacija utiče na sve najveće kompanije, najveća dioničarska društva i banke. Direktna materijalna šteta se, kaže, mjeri milionima KM i oni u Vijeću imaju tačne podatke za svoje članice.

"Ne trpe samo novi potencijalni investitori koji bi došli, nego i oni koji već posluju u BiH. Zbog zadržanog kapitala i neprovođenja novih investicija nismo otvarali nova radna mjesta, pokretali nove proizvode pogone, a banke nisu mogle plasirati svoj kapital", dodala je.

Dom naroda Federalnog parlamenta stoga je pozvan da usvoji Prijedlog odluke o imenovanju članova Komisije za vrijednosne papire FBiH u koju su za članove predloženi Adnan Zukić, Matej Živković, Predrag Mlađen, Esad Dželilović i Romeo Zelenika.

## Pregovarački tim UPFBiH za zaključivanje granskog kolektivnog ugovora za djelatnost trgovine održao sastanak



Sastanak Pregovaračkog tima UPFBiH za zaključivanje granskog kolektivnog ugovora za djelatnost trgovine održan je 26. augusta 2021. godine putem Zoom aplikacije s ciljem pripreme za započinjanje pregovora.

Ovim kolektivnim ugovorom uređuju se prava i obaveze poslodavaca i radnika u djelatnostima trgovine, a reguliše se, između ostalog, važenje kolektivnog ugovora, pitanja iz radnih odnosa i pitanja u vezi sa radnim odnosima, način utvrđivanja plaće, postupak kolektivnog pregovaranja i način mirnog rješavanja kolektivnih radnih sporova te druga pitanja od značaja za uređivanje odnosa između poslodavaca i radnika.

Nakon što Pregovarački UPFBiH tim sprovede pripremne aktivnosti, Sindikat trgovine BiH bit će pozvan na otvaranje pregovora.



# UDRUŽENJE POSLODAVACA

---

**UDRUŽENJE POSLODAVACA FBiH**

**MULA MUSTAFE BAŠESKIJE 12/3, 71 000 SARAJEVO**

**TEL: 00 387 264 830**

**FAX: 00 387 33 552 461**

**MAIL: [info@upfbih.ba](mailto:info@upfbih.ba)**

**WEB: [www.upfbih.ba](http://www.upfbih.ba)**